

四庫全書

經部

欽定四庫全書

經部
四書近指卷

一至三

詳校官左都御史臣李紱

刑部郎中臣許兆椿覆勘

總校官編修臣王燕緒

校對官中書臣王家賓

謄錄監生臣李敦源

欽定四庫全書

經部八

四書近指

四書類

提要

臣等謹案四書近指二十卷

國朝孫奇逢撰奇逢有周易大旨別著錄是編于四子之書挈其要領統論大指間引先儒之說以證異同然意旨不無偶偏如云聖人之訓無非是學此論最確乃兩論逐章皆牽

合學字至謂道千乘之國章敬信節愛時使
皆時習事大學聖經章所論本末先後以明
德須在民上明修身須在天下國家上修又
云格物無傳是大學最精微處以物不可得
而名無往非物即無往非格朱子所謂窮至
事物之理乃通大學數章而言云云皆不免
高明之病蓋奇達之學魚採朱陸而大本主
于窮則勵行出則經世故其說如此雖不必

一一皆合於經義而讀其書者知反身以求
實用於學者亦不為無益也乾隆四十四年
七月恭校上

總纂官臣紀昀臣陸錫熊臣孫士毅

總校官臣陸費墀

金
文
日
曆
合
言

撰
要

四書近指原序

或問學何為也哉曰學為聖人而已曰聖人可學而能乎曰如不可學孟子之所願學者豈欺人語耶曰夫仲尼之道猶天之不可階而升也烏能學雖然東海西海南海北海有聖人出心理自同亦學吾之心而已心以天地萬物為體其操功却在日用飲食之間故曰不離日用常行內直造先天未畫前盡心知性以知天而聖人之能事畢矣周元公曰聖希天程明道曰聖學本天

孔子亦曰知我者其天之外復何事哉維天之命於
穆不已聖人以至誠配天同一不已誠者天之道誠之
者人之道時習之學殆所稱盡人以合天則人也而實
天者乎魯論所載無言不可會通然其教之所重而本
之所匯則時習一語足盡諸賢之蘊故曾子得之而明
德至善子思得之而修道而教孟子得之而集義養氣
以塞天地皆所謂一以貫萬者耳不能得其一者讀書
破萬卷究於自己身心毫無干涉窮年矻矻終老無聞

余嘗與及門二三子拈學而時習一語六經四書不能
滿其分量于聖萬賢不能出其範圍即如清任和至不
一也而所以一之者曰皆古聖人也微箕比干至不一
也而所以一之者曰殷有三仁焉支分派別之中自有
統宗會元之地若其必不能一者是其端與我異者耳
非本天之學也夫子嘗曰不知言無以知人孟子亦曰
我知言魯論二十篇無一言不傳聖人之精神色笑而
出二千年來學聖人之學者戴聖人之天而忘乎高履

聖人之地而忘其深此仲尼之天地所以為大也劉靜
修著有四書精要惜久失傳鹿忠節說約一編為後學
開生面與前聖結同心予四十年領其教旨亦嘗竊以
教我子弟我子弟恐予說之或湮也請述之管窺之識
慙無靈緒仍是陳言第不敢以耄年自甘偷惰云爾事
竣標曰近指見非有高遠之言也時順治己亥大暑前
三日孫竒逢書於兼山草堂時年七十六歲

凡例

讀白文只憑管窺不泥成說總求不謬於孔曾思孟斯已矣先儒爭意見辯異同者概置弗論是編統括四書大旨原非為逐章逐句作解故脫畧者甚多

聖賢立訓無非修己治人親師取友理財折獄用賢遠奸郊天事神明理適用總之皆學也故兩論逐章皆點學字學庸兩孟以學字統括之此近指一編之義

先儒周程張朱稱子餘為人所共知聞者稱號稱地稱

氏至名未孚於遠邇月旦未確或未路難保者槩以或
曰二字冠之間有失考者乙冒甲名流傳不實徒滋眩
惑故致慎焉

先鄙說而後以諸家之說印之其間有圈無或曰字者
仍係鄙說文非相聯意有偶起故不避贅

編中亦有先儒之言及或曰與鄙說小異者正欲借異
以印同非終分道也虛心平氣不執獨見以合衆人之
見其指無二義也

小儒曲士動思著書垂世夫書豈易著哉邪說害道者
不必言言即是而人非君子更惡其言之似也予此編
述吾友四十年提命之言以教告我子弟云爾若以著
書例求之豈如昔賢聖道自我麤明萬萬滅死無悔者
耶非予之敢承也

--	--	--	--	--	--	--	--	--

欽定四庫全書

四書近指卷一

容城孫奇逢撰

大學之道章

此個學字即夫子學而時習之學字合千古帝王賢聖
做此一件生活不盡所以為大道在合德與民而歸於
至善之地蓋德即身也格致誠正乃所以明之也民即
天下也齊治均平乃所以新之也德無一念之不明民

無一人之不新身方底於粹精之域所謂止至善也通
篇總括於壹是皆以修身為本一句功夫全在知止不
知止則毫芒疑似之界最難剖析凡事必先見其大體
之所極而後可以深求其精微之所至定靜安慮皆知
止中歷閱實功也有本末自有終始先非遺末而末即
在本中如明德也須在民上明不能振民育德而謂之
明德乎修身也須在家國天下上修不能親九族安百
姓而謂之修身乎天下無離本之末豈有遺末之本哉

總之身處天下國家之中與物相感應物者失其理便是身不修而正心誠意之功俱屬惘然第使物無不妥所謂知之明處之當也此之謂格物此之謂誠正修而齊治均平一通在內 格物無傳此大學最精微處蓋物不可指名自誠意後康誥盤銘邦畿以及身修正心至平天下章無違非物無違非格朱子所謂窮至事物之理衆物之表裏精粗無不到蓋通大學數章而言也 陳幾亭曰雖曰修身為本要當隨處各有工夫但由

本及末不大費力 或曰春秋時霸圖興諸子出學統
亂于方術此處特提出古之欲明明德於天下一句仰
企古人穆然唐虞三代之想上三節說大學已盡此獨
舉知先大人立個榜樣使人知工夫下手處 顧涇陽
曰河圖洛書是為造化傳神的八卦九疇是為河圖洛
書傳神的大學首篇是就人生以後說起的中庸首篇
是就人生以上說起的西銘是就既有天地說起的太
極圖說是就未有天地說起的分看來相依做不相

假借各開一局合看來實互相助發恰好完却天地間
一個公共的大事件也

康誥曰克章

三個聖人皆明明德於天下者而曰皆自明非論心而
不論事論已而不論民蓋畢世經綸無一事一民不在
洗滌之中非為天下總是為己人人有自而自不求明
是自絕也 三書克明顧諟等俱就日用感應實際處
言非尸居靜攝時如此

湯之盤銘章

新者天地育物之生機人心進進不息之生氣也第患無所以作之則其氣已朽而蠱有所生聖人之新天下也常以道與天下相厲而不令其有蓄蠱焉三個聖人工夫都在已上著落都在民上書以疾敬德為誠和小民之本以誠小民為祈天永命之本原是一套事無所不用其極模寫歷來君子平治苦心曲盡君子無所不用其極隨舉其一而足不必拘拘從已說至民從民

說至命亦不必說全法三王必全法三王似三王各自有缺陷在

邦畿千里章

緝熙敬止是文王之德之純與於穆同一不已仁敬孝慈信各就所當止深於其端而精之不以相雜所謂至善也故以文王作榜樣而緝熙敬止是亦以精益求精益密作工夫者盛德至善民不能忘正為切磋琢磨都在治民上做遂把家國天下皆涵濡於此明德中沒世

不忘正申民不能忘之實賢賢而親親治之大者也樂
樂而利利安之大者也事以有效為美效多而美至
饒雙峯曰有斐是說做成君子之人所以斐然有文者
其初自切磋琢磨中來 按盛德則兼言民不能忘前
王則推本親賢樂利明德新民渾為一事

聽訟猶人章

天地間任舉一物而本與末具焉從其本而圖之不勞
而事理得所先也從其末而圖之徒勞而罔功迷於後

也聽訟一事自矜其才能卽得情亦末耳何如無情者
不得盡民各畏其志而自使之無訟乎大畏民志全在
平日治民時曲盡此心明威出於明德所謂知本也
王泰州曰此謂知本猶言此知本之說也貼在為民上
者身上說

所謂誠意章

誠意是作聖第一關頭經文所謂先致其知者即毋自
欺也自欺自慊人不及知故君子必慎其獨慎獨是誠

意工夫非是兩事小人自欺而卒不容欺益以見獨之
當慎慎是獨中兢業之念所以致知而誠意也獨不特
閒居燕處即紛紜應接中此心有獨覺處小人之見君
子而厭然如見其肺肝然此亦紛紜中獨知也但不能
返照慎思從此一改圖耳十目十手有味乎曾子之戒
心于獨也惟慎始見其嚴非知嚴而始慎也兩個必慎
其獨一個必誠其意發明推究首尾迴環煞有力量

朱子曰許多病痛都在誠意章一齊說了下面有些小

病痛亦輕可見此章最緊切若透過此一關功夫便易
胡雲峰曰誠意獨作一傳然誠意者自修之首已兼
正心修身而言矣章末曰潤身曰心廣提出身與心二
字意已可見

所謂修身章

心體廓然大公物來順應忿懣恐懼等情雖不能無然
非有所一有所則已私橫處於中而心靈遂失其位一
不正卽不在矣心一不在則身無所主視誰視聽誰聽

而飲食又誰為飲食也。軀竅雖是神明全非。此謂修身在正其心。正修工夫總在誠意中。此特舉身心相關處痛切言之。蓋心之所有身不能無也。心之所無身不能有也。身心異用。非理之所許。張氏曰：正修之功夫無一語及之者。蓋已具於誠意章故也。

所謂齊家章

君子以言有物而行有恆。家道之所以正也。辟則有所好惡。安得中節。故美中有惡。都以其好之辟而掩之惡。

中有美都以其惡之辟而掩之這樣好惡則家之心志
自紛耳目自亂如何得齊修身言好惡者蓋家國天下
之通關處也總之一如惡惡臭好好色之誠而貫於齊
治均平之中其功力全在致知上所謂壹是皆以修身
為本任舉一節通體融徹纔是善讀書 問如何修身
專指待人言朱子曰修身以後大槩說向接物待人去
又與只說心處不同要之根本之理則一但一節說濶
一節去

所謂治國章

雖釋齊家治國然必歸重人主之身乃窮源之論不出家而成教言只修身以教家而自然成教於國孝者三句正是不出家而成教於國的柱子心誠求之直推本誠意乃聯屬家以及國之真血脈也一人仁讓貪戾如形之於影堯舜之民仁桀紂之民暴皆一人為帥而天下從之所謂一人者正歸本於君身也有諸已無諸已到底只以身教絕無求人非人之念藏身之恕即堯舜

之帥天下以仁隱然含下絜矩意歷數三詩只於夫婦兄弟父子求宜其實歸結有國者身上去宜之者身也足法者身也故曰壹是皆以修身為本傳者以忠恕明一貫所以稱守約者乎 齊治合傳言身則家在其中言家則皆根身說來總見修身為本意

所謂平天章

上老老上長長上恤孤總是修身以立教於天下第天下大於國須以心擬心人之心本無間于已是以有絜

矩之道已之心能不間于人此之謂絜矩之道好惡能
絜矩則為民父母辟則好惡任意民心必失衆之得失
而國係焉豈容不慎慎德君子是從獨知處慊好惡之
原而矩之所從出者矩之絜于財用最為喫緊蓋民之
所欲在財所惡在奪其財民散而財焉可留民聚而財
將焉往慎德君子於本末內外悖入悖出之際卽欲不
慎不可得也矩之絜於用人以理財者更為喫緊與賢
者共理則財下注仁義孝弟慈之行生於世矣與小人

共理則財上注暴亂劫奪之俗盛於時矣慎德君子於
所謂舉而先退而遠好人好而惡人惡者即欲不慎不
可得也人主不能論相則一人用舍之誤足以自禍其
子孫宰相不能好賢則一念愛惡之偏足以空人之家
國是以平天下之君子必以其矩而絜之於用人不能
絜矩媚嫉之人也於財用不能絜矩聚斂之臣也是道
也必忠信方得蓋忠信是真實心矩之體也即所謂誠
意也仁者便是忠信不仁者便是驕泰仁者以財發身

以義為利也不仁者以身發財以利為利也此章只總
註與民同好惡而不專其利一句括盡 朱子曰絜矩
不是外面別有個道理只便是前面正心脩身底推而
措之 陳嘉善曰曾子傳一貫不言一貫而言絜矩其
義一也在道則言一貫在天下則言絜矩此矩即從心
所欲不踰之矩聖人不必言絜言絜則是忠恕其於學
者最可把握湯武反之亦是絜矩 胡雲峰曰義利之
辯大學之書以此終孟子之書以此始道學之傳有自

來矣

一經十傳只修身為本一句盡之合格致誠正而始
為身之修總齊治均平而始滿修之量此學之所以
為大也然其指趣既已無窮而工夫自不容有間故
夫子曰學而時習之

四書近指卷一

欽定四庫全書

四書近指卷二

容城孫奇逢撰

天命謂性章

中庸闡道之微言子思子從頭指點出性命來所謂天命流行物與无妄天之所予與生俱生故曰性也性無增減只任他本來流出便是道是生知安行者事本於天者一落於人便不能無增減聖人立教是盡人以合

天一部中庸皆修道而教之事也教雖以孔子為開山
從古神聖立極作君作師皆所以鼓鑄斯世以裁成天
地輔相生民戒慎恐懼慎獨正所以修道也修之使無
須臾之可離蓋道原不能離人而人不能不離道戒慎
恐懼是全體功夫慎獨拈出關鍵乃下手處也喜怒哀樂
是吾人之所以與天地萬物相為醇酢者一不中和則
干天地之和傷萬物之命君子戒懼慎獨無須臾離道
之時則未發而中發而和干變萬化無不握樞於此六

通四關無不順適於此天下大本正是性的註脚天下
達道正是道的註脚致中和而位育便是教的註脚嘗
試驗之此心一息清明便有一寧謐之境活潑之趣况
致中和者耶總之性命不得分為兩物中和不得分為
兩念戒懼慎獨不得分為兩功位育不得分為兩事至
未發與發亦不得分為兩境天何言哉是喜怒哀樂未
發氣象四時行焉百物生焉天何言哉到發處依舊是
未發氣象也故曰體用一原顯微無間 鄭淡泉曰喜

喜怒哀樂一節不是原起說乃是說戒懼不睹不聞慎獨
後復本體也致中和天地位萬物育不是又進一層工
夫俱在戒懼慎獨中位育不可分屬中和亦不可言以
此位天地育萬物只是聖人在天子之位天地萬物各
得其常耳不是分外禎祥之類也書曰夏后方懋厥德
山川鬼神亦莫不寧暨鳥獸魚鼈咸若也即無位者能
如此修道一家之中父母親族童奚相安耕漁蠶織雞
豚狗彘竹樹果蓀各遂其生亦是位育 湛甘泉云中

和者人所初受於天與聖人同者也然必加戒懼慎獨之功方能復此本體李延平與文公說如此按湛氏據延平之說中和大本達道就養成後言最是

君子中庸章

君子之中庸與小人之中庸外面都是一樣只君子通體戒懼無須臾之不中純是未發氣象故發皆中節所謂時也小人不知天命之可畏全無忌憚作用彌似本體愈非所以曰反中庸反字正從似上看出然非聖人

不能辨蓋亂先王之法而破先王之道者非闖茸猥瑣
之流正慮此無忌憚者之混跡於時中也 許魯齋曰
時有萬變事有萬殊而中無定體當此時則此為中於
他時則非中矣是以君子戒慎恐懼存於未發之前察
於既發之際大本立而達道行故堯舜湯武之征讓不
同而同於中三仁之生死不同顏孟之語默不同其同
於中則一也明乎此則可論聖賢之時中矣

中庸其至章

至字是天生成一個極至之理再不容人增損於其間不用人為却要人能無奈民之鮮能久矣然有感慨舜之用中回之擇中强者之中和正是能的作家

道之不行章

中庸之道一日用飲食之常而已道無乎不在而在口則能知味著一毫過不得著一毫不及不得過與不及而味皆不存焉賢知非自以為過而自道視之則過不肯為庸者也愚不肯非自以為不及而自道視之則不

及不能為庸者也此民之所以鮮能也人人有道中而
人人不能行不能明故曰人莫不飲食鮮能知味也
或曰過不及非盡生稟之異賢知愚不肖失中正是他
不能變化氣質處只看雖愚必明二句便見氣稟不足
限人當自求明行意

道其不行章

此句闢通上下深有感慨由不明故不行既不行則思
其所以明之者此正知行合一之旨

舜其大知章

中庸之道民雖鮮能然中之所以散見者民未嘗不各具舜之好問好察是於至淺至近之中皆可會性命精微之旨道原不分遠邇高卑也非善與惡對為兩端就問察中惡的隱了其所得於善者縱千百萬億止可謂之兩端執則會在一處提衡斟酌討出中來而用之正見其行之至處於民二字見大舜不執我善與人同之意金中洲曰此是首引舜以證君子中庸為賢知愚

不肖立榜樣將大知二字為主下面總是大知流通貫徹見出個中的道理來恰合著中庸處仲尼所謂君子中庸者類如此

皆曰予知章

予知二字是賢知一生受病處不能擇而自納諸陷阱尚可曰知乎能擇矣而不能期月守果遂謂之知乎天下事雖曰能知纔能行尤須能行纔算知知行合一是一聖人最喚醒人處陽明每發此甚透 陸象山曰名利

如錦覆陷阱使人貪而墮其中到頭只贏得個大不惺
惺去按此語形容予知最切又云與溺於利欲之人言
猶易與溺於意見之人言却難言獲陷阱能擒取禽獸
者餌昏之也禍機能陷人者利昏之也隱恠能悞人者
意見昏之也按此論甚正

回之為人章

拳拳服膺是極力刻畫其能守能守始完的一個擇乎
中庸故以為道明大舜之知問察隱揚而執兩端止完

的一個用中故以為道行行在明處行明在行處明諸章大旨俱如此 郝京山曰顏子何處擇何處得日用視聽言動隨事體驗感動觸發天機自然躍出豈閉目靜坐空談揣摩能擇而得乎蓋由之而後知之也

天下國家章

竒跡高蹤天下所駭焉而以為不可能者却無不可能獨此中庸極平常極易簡天命流行著不得一毫氣魄至誠無息容不得一刻作輟此民之所以鮮能也人甚

勿易其所難而難其所易方可與入道 朱子曰中庸
便是三者之間非是別有一個道理只於三者做得恰
好處便是中庸

子路問強章

君子之中和是從戒懼慎獨無須臾可離之時見出此
性道之本體和為天下之達道自不流中為天下之大
本自不倚以此不流不倚者而閱乎有道無道之世當
自有毅然不變者在此強之所以超於南北為而之所

當強者也四個強哉矯見君子以自強不息能中庸者正是此等人 胡雲峰曰流字倚字變字皆與強字相反不流不倚不變三不字有骨力是之謂自強南北以勝人為強其強也囿於風氣之中君子以自勝為強純乎義理而出於風氣之外此變化氣質之功所以為大也

索隱行恠章

隱恠有迷未免是過吾弗為不當為也遵道而廢未免是及弗能已不當已也不當為者不為不當已者不

已既無過不及則依乎中庸矣依字有渾合為一之意
遜世不悔正見依中庸之親切處到世人與我相違毫
不萌介介之念此之成色方足夫子開口說人不知不
愠又說不見知不悔此是聖學到底人終難知故曰知
我者其天惟聖者能之中庸固非絕德在人為之耳自
仲尼曰至此中庸第一支也 或曰身既遜人又不知
却無纖毫怨悔惟日孳孳此所謂潛龍也所謂無所為
而為者也方是聖學本旨故末篇復由闇然為已推至

無聲無臭以終之 遜世與避世別避世必隱遜世不
必隱君子有中庸之德不大聲色人自與之相違如天
山之兩相望而不相親故曰遜聖人只不悔而已老氏
知希我貴便多一層意思去中庸道理遠甚

君子之道章

至矣哉道之費而隱乎道原於天者也天之時物行生
亘古如斯矣而其所以行之生之者亘古莫窺也一屬
於君子之身便與天同體與天同用費字正從不可須

與離發根運用充塞察天察地總只在不覩不聞之中
夫婦之與知與能聖人之不知不能與天地之有憾總
是形容道之費處故大莫能載小莫能破道非有大小
因語而有大小也鳶魚一詩正指點道機滿前上下昭
著至其所以察上察下者仍非見聞所及也造端夫婦
就與知與能而推至之則察乎天地收拾到實體處方
是君子之道以下諸章皆君子修道處 胡雲峰曰道
體每於動處見本自活潑潑地聖賢教人每欲人於動

處用功亦是活潑潑地鳶飛魚躍道之自然本無一毫
私意勿忘勿助學者體道之自然亦著不得一毫之私
意 張卓菴曰中和中庸費隱名義雖殊理實合一費
隱概言道體中庸則道之見於行事者中和則又君子
之所以中庸也 道在天地有上下在聖人夫婦有知
能在萬物有飛躍總是一個機括機括顯處是費機括
藏處是隱

道不遠人章

不可須臾離者道也道豈有遠人者哉即子臣弟友之人而道在是矣為之而子不子臣不臣弟不弟友不友是遠人以為道也豈可以為道以人治人者於子也如其子之道而止於臣也如其臣之道而止於弟也如其弟之道而止於友也如其友之道而止勿施於人者不願於子之道即勿施於子不願於臣之道即勿施於臣不願於弟之道即勿施於弟不願於友之道即勿施於友忠恕二字從以人治人落出而勿施於人則其能事

也夫子之一貫夫子之忠恕忠恕正體道者實用功夫處四個所求四個未能真見得實有難盡聰明才知到此庸德庸言上一毫用不著兩個不敢全是一段戒懼精神斂藏不露既不流於隱恠又不廢于半途彼為道而遠人者正未觀於慥慥之君子也 朱子曰緊要全在道不遠人一句言人人本自有許多道理只是不曾依得這道理却做從不是道理處去 葛此瞻曰忠恕二字須句句切道不遠人子臣弟友方是若只將一貫

仁恕終身可行絜矩等填入非也 黃寓庸曰君子之道無有餘不足故曰中庸有餘不足皆病也合言行皆有只是放肆便於言行上照顧不來故曰不敢不勉曰不敢盡不敢卽兩顧字精神

素位而行章

人生適意之境止有一富貴其餘意外之遭皆拂逆也拂逆者不能堪故多冀望於非分之獲以寄愉快不知非分之獲亦與喪其所有者同害况未必獲乎君子於

此有道焉一日有一日之位一位有一位之行境雖逆
有道以居之雖逆順也境雖順無道以居之雖順逆也
此素位之君子所以無入不自得也自得則無求人之
事不求人則無怨尤之心得力只在正己正己只在反
求以此閱世齊得喪渾成虧易簡而天下之理得矣
或曰子思引夫子之言非徒結上正借此警惕一番見
不可不反求意上文言得此言失上文言不求此言反
求惟反求正己一切求人念頭消融淨盡終日乾乾只

此一事不如此反求便不能不願外

行遠自邇章

道何嘗有遠邇高卑哉未行而見為遠者及行至此則遠者又為邇矣未登而見為高者及登至此則高者又為卑矣聖人不離庸行而上達天德從卑邇起而高遠即在其中好合既翕其順非卑邇非高遠亦卑邇亦高遠正可想行遠自邇登高自卑之意或曰君子之道就人倫日用便可經綸參贊故取譬於高卑遠邇非謂

道有高卑遠邇也妻子和兄弟翁父母順此便有中和節氣象便有天地位萬物育氣象正猶邇之未始非遠卑之未始不高行千里登絕頂皆始於足下也道寓諸庸而不遠人凡外夫婦知能而素隱行恠者皆非也

鬼神為德章

鬼神之德即率性之道不覩不聞而莫見莫顯道之所以不可離弗聞弗見而體物不遺神之所以無不在物之體也即鬼神之德也天下無二鬼神驗之祭而鬼神

體祭祀驗之承祭祀之人而鬼神體承祭之人發現昭著不可測度總之體物不遺形容鬼神之德之盛而其所以盛者誠也誠者天之道誠之者盡人以合天之道此之不可掩蓋以鬼神之情狀發明中庸微顯之義後章諸誠字皆從此立根 夫子與季路論鬼神曰未能事人是只以盡人為主而鬼神聽令焉子思子言鬼神而要之誠正盡人以合天之事未可作岐觀也 金中洲曰此以鬼神明中庸劈頭說個德結尾說個誠中間

提出齊明二字分明見鬼神不外人心人心即是鬼神何處更著隱恠前面言夫婦爲魚言子臣弟友言富貴貧賤等境遇并言妻子兄弟父母皆從顯處見顯至此忽插鬼神一段却又從微處指出個顯來見鬼神至變幻至微茫都是至平常道理須識得鬼神與中庸合德處

舜其大孝章

人謂吉凶休咎有數存焉非人之所能必也予謂吉凶咎之氣從類而附吉以陽類從順咎以陰類應逆此因材

之天理有固然由是觀之人事而已豈有天哉舜孝之
大以德為聖人尊富保饗自應享此迪吉之慶然祿位
名壽大舜雖無必得之心而大德却有必得之理觀嘉
樂之詩有宜民人之令德則保佑申命而大德之必受
命固不獨一舜也結語自見 董仲舒曰為政而宜於
民固當受祿於天他說得自有意思

文王無憂章

美里演易正其憂患之心何以云無憂也惟能盡中庸

之道上承賢父下開聖子時宜無憂故若見為無憂文
王亦不自覺其無憂也武王憂在纘緒時當征伐而征
伐天下之顯名不失而尊富保饗俱得武所以為善述
也周公憂在成德時當制禮而制禮以尊親而成其孝
事先人之德以錫類而成其孝治天下之德無隱不宣
無遠不屆總體武王受命之末未及為者而曲致之周
公所以為達孝也是即武王之孝之達也下章達字本此
父子兄弟之間雖若各做一事而時至事起精布神流

此可想見時中之君子

武王周公章

孝而曰達變而通之與時宜之全無一定格式而恰合乎天理人情之極至故曰善繼善述不必前人實有其志事時至事起但不惡於己志卽不疚於先靈修祖廟節念念在祖考敬其所尊也序昭穆節事事在子孫臣庶愛其所親也踐其位節如起先王於今日而時義當然卽與上世相貫接所以曰善繼善述為孝之至也惟

其至是以達達以通於人而無一處之或隔至以盡於已而無一念之有憾郊社禘嘗正發明達字以歸束一篇之旨斯禮也斯義也幽以通覆載本源之精明以成太和永清之治然總不離家庭日用之常初無驚世駭俗之事此所以為中庸也乎 或曰聖王宗廟中尊尊親親賢賢貴貴老老幼幼皆處置得委曲周至以此行之家則家齊行之國則國治原是現前實事更不煩推致得

哀公問政章

此章是夫子經綸萬世的大手段哀公果能用其言則為當日之文武千載下有能用其言者則為後世之文武文武之道未墜則文武之政常新此夫子憲章之功當與天地不朽其人存一句是一篇骨子未有無其人而能舉其政者夫子雖與哀公論政實與哀公論人故明取人之本在於修身身必至於仁而修始實仁者節詳修身之事義禮是仁中條貫總完得所謂修道以仁

耳仁者人也此語極其喚醒人莫非人而仁者誰乎君子不可不修身正不可不以仁也達道根身來離五者便不成個身故曰仁者人也仁必合知勇始備故五之所以行者三三之所以行五者一而已矣及其知之一及其成功一謂天命之性本一也故所知所成無可異焉三近字正應一字要其成就處曰一計其用功處曰近知身是知仁勇之身則以身取人以人舉政奚難推致哉九經所謂文武之政布在方策者也其道有常而

不可易其序有條而不可紊能舉其事自奏其效然總不離乎修身方能各當其理而無不行耳非行之者一乎兩言所以行之者一見天下千變萬化總根於一二者豫道也前定也非以豫前定為誠乃是所當豫所當前定者謂先立乎誠也誠身工夫全在明善誠身是兼格致誠正而言至於誠則順親信友獲上治民一以貫之而達道達德九經皆前定而立矣誠之理出於天而誠之功切于人擇善是惟精功夫所謂知之一成功一

也博學二節正備言所以知之一成功一之事果能此道矣道即誠之者之人道明就是知之一強就是成功一兩必字是決其氣質可變而此身之能歸於誠也身誠方謂人存人存自能敏政鼓動哀公處淋漓痛快千載下噓之有生氣自費隱至此曰庸德曰素位可謂卑邇矣曰鬼神之德之盛可謂高遠矣然實無卑邇無高遠也至論舜文周孔經綸制作莫非真性所不能自己所謂誠之不可掩也又安有卑邇高遠之殊此是中庸

第二支 顧涇陽曰不思而得精神恰在得字上不勉而中精神恰在中字上要學聖人須從這裡叅取及其知之一及其成功一試看這話頭還論個得不得中不中還是論個思不思勉不勉 馮少墟曰博學之五個之字皆指善字善卽上文不思而得不勉而中道理擇善固執是擇其不思而得者思之又思以至於不思而得擇其不勉而中者勉之又勉以至於不勉而中是之謂擇善固執弗措之志弗措乎此也百倍之功百倍乎

此也若不辯得之字明白縱博學審問慎思明辯篤行到底總只是外面功夫 或曰此章便是祖述憲章之事達道九經帝王為政本末盡於此工夫只在學問思辯行其要則明善以誠身重困勉可進於生安意 文武之政四字提出文武作主下文達道九經非必盡出于方策要之理同則道自不異此所以上通堯舜下該思孟也學者宜活看

四書近指卷二

欽定四庫全書

四書近指卷三

容城孫竒逢撰

誠明謂性章

性而得之與教而得之雖以之分天道人道然其事同於誠明耳誠明固相須而不容相離者也則性教亦何以別哉但得人天合一正不必問功力先後一部中庸皆是著人從教下手彼高天事而薄人功者皆不明之

甚者也 饒雙峰曰此章大意是繳上章言誠者天之
道誠之者人之道一向分兩路說去則天人為二也到
此章方合說誠則明矣明則誠矣指人道可至於天道
合天人而一之也

至誠盡性章

只能盡其性一句便已了當性通天地萬物為一體舍
人物之性盡從何處下手參贊於何歸著故天地位萬
物育只是一個致中和 或曰盡其性者是知之行之

無不盡之云也盡人物之性者知之無不明處之無不當之云也如新民止於至善乃是新之止於至善 問如何盡人之性曰如教以人倫使之父子有親君臣有義之類皆是問如何盡物之性曰如牛耕馬馳各適其用之類

其次致曲章

性有全體有端倪能盡其性者一舉而分量以畢曲能有誠者漸次而功行亦完故天能者人能者亦能盡

性者盡復性者亦盡也知此義者真是普天下無人不
可作聖孟子凡有四端於我者知皆擴而充之正是其
的傳 程子曰其次致曲者學而後知之也其成也與
生知者無異故君子莫大乎學莫害於畫莫病於自足
莫罪於自棄學而不止湯武所以聖也 朱子曰至誠
盡性則全體著見次於此者未免為氣質所隔只如人
氣質溫厚其發見多是仁氣質剛毅其發見多是義隨
其善端發見便推致以造其極非是止就其發見一處

推致之也如克無欲害人之心而仁不可勝用克無穿窬之心而義不可勝用此是致曲處

至誠之道章

至誠前知亦必於動處見所謂幾者動之微吉凶之先見者也故迹雖如此幾乃如彼祥或作凶妖或兆吉其理非至誠莫能知亦曰知之於善不善而已矣 顧涇陽曰禎祥興兆也非興本也必有所以興者矣妖孽亡兆也非亡本也必有所以亡者矣鬼神於所以處知之

故顯出個禎祥妖孽來至誠於所以處知之無論在位與不在位可為與不可為到處有一副真精神密密幹旋非但知之而已也故曰如神 或曰禎祥妖孽按必有二字緊根興亡說是從興亡分妖祥非以妖祥卜興亡也將興之國雖妖不為災將亡之國雖祥不為福雉升鼎耳殷道以興鸞集朝堂隋煬以亡豈不以人哉蓋見祥而為不善則祥反為妖見妖而迎以德則妖反為福張敞釋鷓鴣雀之論歸本于得人京房言災異之變推

咎于用不肖皆明於祥妖之理者他如桑穀王商法星
壽宋白雉亡漢黃犀死莽惡在祥必興國孽能亡家也

誠者自成章

誠者自成一句已盡自原備萬物一物有遺卽已一處
有缺欲自之成也非自道而誰道哉物之自有而歸于
無曰終自無而遞為有曰始是物之始終一誠之所為
不誠則誰為終之始之者乎自萬物言誠通誠復體物
不遺也自一身言體受歸全君子以誠終始吾身即以

誠終始萬物孟子所謂反身而誠樂莫大焉誠之為貴
宜何如置力乎成已成物無二理亦非二事把柄在已
著落在物當成已時非為成物乃所以成物也成已成
物似有內外之分然成已是仁成物是知仁與知均為
吾性之德豈可分內外仁固涵在性中知即合在仁上
所以為外而合于內之道也時措之宜若取諸寄若逢
其源此即君子之時中亦然適以滿其自成之量了其
自道之功而已矣 或問朱子成已合言知而言仁成

物合言仁而言知何也曰克己復禮為仁豈不是成已
知周乎萬物豈不是成物

至誠無息章

聖人與天地合德總此一誠天地得之而不貳聖人得
之而無息不貳者不已無息者不已聖天自是印合天
下事真的不滅假的易息至誠之不息而久久而徵也
此正合外於內處悠遠博厚高明六字意實相因一時
並集以存諸中者言則悠遠在高明博厚之前以見諸

用者言則悠久在博厚高明之後盡兩間所有具在至誠心體中此至誠之所以配地配天配無疆也配者合而有助之意有天地自不容無至誠盡民物之性以贊化育之不及皆是至誠性中自然流出如此者故不待見不待動不待為耳兩揭天地之道正見以前皆言聖人之道為物不貳正映一字一真默運沒有別個更端是為生成之根天之所以為天文之所以為文乃見天地聖人之合體純亦不已在至誠身上說信乎至誠無

息也 或曰只無息二字形容至誠已盡博厚高明配
天配地皆是無息處至誠之無息不可見就其發用之
彰灼者觀之愈可以見至誠之無息耳故說外即是說
內原無兩層 前段為物不貳即是不已意已說明天
之所以為天至誠無息即是純德已說明聖之所以為
聖引詩只作證佐不是另進一層推出天地聖人所以
然處

大哉聖人章

聖人未生道在天地聖人既生道在聖人中庸每揭君子之道此云大哉聖人之道蓋以其道屬之人矣洋洋優優總以昭其大也三千三百正發育峻極之實際處即禮之充然於天高地下之間莫能破者方見其莫能載耳聖人不常有所望君子以道問學成尊德性之功所以凝道上下治亂咸宜正是修凝妙用能保此身無違不宜大哉聖人之道無餘蘊矣 王陽明曰道問學即所以尊德性也晦翁言子靜以尊德性誨人某教人

豈不是道問學處多了此子是分尊德性道問學作兩件且如今講習討論下許多工夫無非只是存此心不失其德性而已豈有尊德性只空空去尊更不去問學問學只是空空去問學更與德性無關涉如此則不知今之所以講習討論者更學何事 顧涇陽曰温字下得極好勿忘勿助一團生氣醞釀處無限機趣所謂新也始之以致廣大盡精微極高明道中庸終之以敦厚崇禮可謂十分周整却于中間點入此一語更覺活潑

潑地 或云元吳澄曰問學不本於德性則其弊必偏於言語訓釋之末故學必以德性為本議者遂以澄為陸氏之學愚按尊德性之說發自子思陸氏特因而從之耳於子思則稱之於子靜則斥之豈非貴耳而賤目與且朱子晚年未嘗不歸本於尊德性觀其語學者曰此本是兩事細分則有十事其實只兩事兩事又只一事只是一個尊德性却將個尊德性來道問學所以說個尊德性而道問學也由此推之朱陸本同學者必致

疑於陸氏何哉

愚而自用章

天王創法天下守之千古莫能易也故作制自上非者猶是作制自下是者猶非衆為制者無從制則法且為亂安能治亂哉大凡為下而倍多是自用自尊反古全與明哲保身者異故哉及之以三事言曰議禮制度考文以二事言曰作禮作樂以一事言只一禮而已矣孔子豈不能創制立法只為無位遂至束手其曰吾從周正

不敢自用自專以反古之道也 蔡虛齋曰末節夫子
之所感者深矣一以見先王一代制作其良法美意不
得盡傳於今一以見已不得取先王之遺典集其大成
以垂大法於後其曰今用之吾從周者不得位而安為
下不倍之道耳不然只說從周便了何必遠引夏云云
蓋其意甚遠其抱負甚大但此意非中庸此章之旨中
庸所重只在從周一意

王有三重章

為務不重則發不盡理發不盡理則往不應情此王天下者之必有三重也有三重既非上焉者之無徵又非下焉者之不尊民焉有不信而從之者乎故君子欲得民之信從不遽求之民也本自一己之德性立為庶民之章程考之建之質之俟之俱以此耳蓋惟有道在自可以此而叅合乎彼也知天知人正是本諸身處為道為法為則有望不厭正形容本身之妙民之寡過便是君子有譽引詩決言譽之必有其本徵諸庶民從本諸身

來三王後聖天地鬼神從徵諸庶民來此方是居上不驕 鹿伯順曰三王後聖天地鬼神都是一個理天下外不了一個理理外不了一個心你看一點良心之以為自然而然不得然的便是天地之所以為天地鬼神之所以為鬼神三王之所以為三王後聖之所以為後聖然文法吞吐不為三王後聖天地鬼神只為民從說看通章要認主不然一句一個理不成中庸 或曰世為天下法則正緣君子動言行無一不本於天理人

情之至非君子強天下後世從我天下後世自不能外
君子而自為動言行耳百世不惑自聖人而言此又就
衆人言可見無聖凡一也

仲尼祖述章

道原於天地而四時日月則其昭宣者也道肇於堯舜
而文武則其煥發者也仲尼以一身會帝王天地之全
此中庸之道所以常明如日月常行如四時此中已涵
小德大德在內不害不悖即於並處見之有害有悖何

以為並育並行也天地之化散之為物運之為道而統之則為德德豈有小大哉就其分處語之天下莫能破焉優優是也就其合處語之天下莫能載焉洋洋是也川流見生物之不測敦化見為物之不貳此天地之所以為大也仲尼之德一天地而已矣 林次崖曰大德小德只天命之謂性一句便了自命處說則曰大德敦化自性處說則曰小德川流一自源頭說一自承受說

聰明睿知章

前章言高明配天未詳其所以配故一一拈出聰明睿知合寬裕溫柔十六字俱宜在至聖心內看要體貼為能字見臨容執敬別皆所不可少者惟至聖方足以有之即體而用見矣狀至聖之有臨而列四德之目目各有脈絡井然真所謂小德之川流也然其發脈處廣大靜深非徒以緒出為奇時出指聖心之靈活應用之妙敬信悅者以當其可也當其可之謂時全重在全聖身上見聖體與天體無二到得配天只是至聖本分事所

以為天道也 鹿伯順曰天以下凡有血氣無一個不
靠至聖作主有一件本領費周張便厭不得民心有一
處不厭民心便臨他不起聰明睿知的資格纔做得這
臨字的生活容執敬別總是臨的物料幾個足以有極
耐咀嚼

經綸大經章

大凡天下事以智數行之即一節一目有不可為者矣
以至誠出之即極天極人有不可行者哉五倫之際雖

事繁而禮重然發於仁心其數俱足以相克是能經綸
天下之大經也天下之大經取諸至誠而足則天下之
政事紀綱亦取諸至誠而足靜深莫窺其變化之端是
能立天下之大本也易曰天地絪縕萬物化醇絪縕者
天地之至誠也天地之氣實故大化無窮同其事者功
有補于造化心無間于天地是能知天地之化育也三
者之用甚大今雖謂其事如是而人或不能信也惟身
有者斯覩其必然耳故曰苟不固聰明聖知達天德者

其孰能知之德即天命之性容不得一毫人為故曰天德入德者從闇然著手便與天同體故曰達天德此之謂大德敦化 至聖至誠兩章雖分承川流敦化然實無可分也容執敬別川流也而溥博淵泉是其敦化寬裕溫柔川流也而足以容便是敦化發強剛毅齊莊中正文理密察川流也而足以執足以敬足以別便是敦化天下之大經天下之大本敦化也而分之合之變之化之是其川流天地之化育敦化也而民之安物之阜

鳶之飛魚之躍是其川流流者流其敦化敦化者敦其
川流原分之而無可分者也學者識得此義方可讀中

庸

衣錦尚絀章

承上章固聰明聖知來闇然二字是一篇骨子淡簡溫
正畫出闇然形狀知遠三句是實落下手處自潛伏至
篤恭不過克此所知而已微正與闇相照潛伏孔昭正
說知微之顯處而其得力全在內省惡從疚生疚自省

除此中之微原不見君子不見是圖所以不及敬信在
不言不動正是省于內而免於疚惡也爾室屋漏正透
闇字意民勸民威是神行於莫見莫顯之際不賞不怒
是真涵于不覩不聞之中君子篤恭只闇到極處天下
平是我與天下各安其性命之常也上天之載無聲無
臭此纔通極于天命之初方是歸根學問此中庸第三
支首篇自天命說起而後及於功夫末篇自下學說
起而直合於天命首云修道末云入德內省即是慎獨

敬信即是戒懼不賞怒不顯即中和之致勸威天下平
即位育之事自源得流以流合源此之謂一部中庸

王鞠劬曰重一闇字數不字皆形容闇字歸結兩無字
而闇止矣中庸原道於天故說到極至地位只是復歸
于天亦只完得個闇中庸首章是發端故句句著實說
此章是收拾故句句要虛活說節節引詩咏歎淫泆與
大學釋至善同體若實說再敘入德成德之事又是從
頭做起中庸 陳紫峰曰中庸一書始之以天終之以

天夫學所以學為人而始終以天焉者天人一也不天
不足以盡人故始以天命之謂性自天而人也終以上
天之載無聲無臭至矣則自人而天也 黃勉齋曰中
庸始言戒懼慎獨次言知仁勇終之以誠此數字括盡
千古聖人教人之旨 大學經世之實用中庸闡道之
微言其間舉舜之受命武之緝緒周之制禮皆千古非
常之事而名之曰孝曰達見奇事皆歸于庸德也對哀
公道德九經而一通之於誠見王道必本於天德也至

論鬼神之德性教之自天人之一以及篤恭不顯無聲
無臭總于本體上無加反之天命之始而不外喜怒哀
樂之常乃所以為中庸也前人謂中庸多無形影說下
學處少說上達處多且教人著力去看大學看論孟以
為讀書之序此為後學設法難以語上之意至謂多上
達而少下學愚謂離下無上上達即在下學中也夫子
一生只是下學而祖述憲章上律下襲於此立極一部
中庸皆修道而教之事總不出學而時習之一語

四書近指卷三